

阿毗達磨大毗婆沙論卷第九十六 物六

五百大阿羅漢等造

唐三藏法師玄奘奉詔譯

智蘊第三中學支納息第一之四

彼後所引舍利子經亦不定遮一時生義謂

舍利子善知入出覺支定心於覺支定隨心

所欲能自在住此依時分說住覺支隨意自

在不說別起一一覺支故不成證復次彼經

依住三地覺支故作是說亦不違理謂於日

初分欲住有尋有伺地覺支即便能住於日

中分欲住無尋有伺地覺支即便能住於日

後分欲住無尋無伺地覺支即便能住故作

是說不違俱起復次彼經依住三根相應覺

支而說亦不違理謂於日初分欲住樂根相

應覺支即便能住於日中分欲住喜根相應

覺支即便能住於日後分欲住捨根相應覺
支即便能住故作是說不違俱起復次彼經
依住三三摩地俱生覺支而說亦不違理謂
於日初分欲住空三摩地俱生覺支即便能
住於日中分欲住無願三摩地俱生覺支即
便能住於日後分欲住無相三摩地俱生覺
支即便能住故作是說不違俱起復次彼經
依住三智俱生覺支而說亦不違理謂於日
初分欲住盡智俱生覺支即便能住於日中
分欲住無生智俱生覺支即便能住於日後
分欲住無學正見智俱生覺支即便能住故
作是說不違俱起復次彼經依住九地覺支
而說亦不違理謂於日初分欲住未至定等
三地覺支即便能住於日中分欲住後三靜
慮地覺支即便能住於日後分欲住前三無

色地覺支即便能住故作是說不違俱起或復有執靜慮近分有喜無戒或復有執靜慮中間以上諸地有正思惟或復有執無色地中亦得有戒爲遮此等種種異執及顯正理故作斯論答若依未至定念覺支現在前時學六覺支八道支現在前無學六覺支九道支現在前此中六覺支者除喜覺支九道支者正見正智隨除一種餘皆具有此說即遮靜慮近分有喜無戒亦有誦言若依有尋有伺未至定念覺支現在前者雖於義無益而爲除疑故作是誦如餘處說依未至言通靜慮中間及上地近分皆未至彼根本定故立未至名今爲簡去靜慮中間及上近分故說若依有尋有伺未至定言此顯惟依初靜慮前未至定念覺支現在前若依初靜慮念覺

物六

二

支現在前時學七覺支八道支現在前無學七覺支九道支現在前此中九道支者如前說餘皆具有若依靜慮中間念覺支現在前時學六覺支七道支現在前無學六覺支八道支現在前依第三第四靜慮亦爾此中六覺支者除喜覺支學七道支者除正思惟無學八道支者除正思惟及正見正智隨一此說便止上地亦有正思惟執若依第二靜慮念覺支現在前時學七覺支七道支現在前無學七覺支八道支現在前彼地有喜無正思惟餘如前說若依無色定念覺支現在前時學六覺支四道支現在前無學六覺支五道支現在前此中六覺支者除喜覺支學四道支者除正思惟及正語業命無學五道支者即除前四及正見正智隨一此說便止無

物六

三

色定中亦有戒執擇法精進輕安定捨覺支
正見正勤正念正定道支亦爾皆通一切地
如念覺支故此即總說有差別者若正見道
支現在前時定除正智若依初靜慮喜覺支
現在前時學七覺支八道支現在前無學七
覺支九道支現在前此中九道支者正見正
智隨除一種餘皆具有若依第二靜慮喜覺
支現在前時學七覺支七道支現在前無學
七覺支八道支現在前此中學七道支者除
正思惟無學八道支者除正思惟及正見正
智隨一問何故近分地無喜覺支耶答非田
器故復次諸近分地已離下染未離下染俱
得現前未甚希奇故不生喜如人被縛及解
脫時所得勝事心於此事不以爲奇故不生
喜復次若近分地亦有喜者與根本地應無

差別復次若近分地亦有喜者應耽著此喜
不求根本地若爾便應障離下染如人中路
有所耽著於所趣方不能速至故諸近分無
喜覺支若依未至定正思惟現在前時學六
覺支八道支現在前無學六覺支九道支現
在前此中六覺支者除喜覺支九道支者正
見正智隨除一種餘皆具有若依初靜慮正
思惟現在前時學七覺支八道支現在前無
學七覺支九道支現在前此中無學九道支
者如前應知問何故上地無正思惟答非田
器故復次爲對治尋希求上地若上地中亦
有尋者應不希求起勝加行復次若下地法
上地皆有是則應無漸次滅法若無漸滅法
應無究竟滅法若無究竟滅法應無解脫出
離涅槃勿有此失是故上地無正思惟復次

正思惟麤上地微細復次正思惟者是尋求相上無尋求故彼非有復次若地中有身語表業及五識中隨有一種可於此地有正思惟上地中無身語表業及五識身故彼非有若依未至定正語現在前時學六覺支八道支現在前無學六覺支九道支現在前此中六覺支者除喜覺支餘如前說若依初靜慮正語現在前時學七覺支八道支現在前無學七覺支九道支現在前此中無學九道支者如前應知若依靜慮中間正語現在前時學六覺支七道支現在前無學六覺支八道支現在前依第三第四靜慮亦爾此中六覺支者除喜覺支學七道支者除正思惟無學八道支者除正思惟及正見正智隨一若依第二靜慮正語現在前時學七覺支七道支

物六

五

現在前無學七覺支八道支現在前此中學七道支無學八道支俱如前說正業正命亦爾者俱惟六地有故問何故無色無正語等三種戒耶答非田器故復次戒是色一分無色無色故彼無戒復次戒是大種所造無色無大種故亦無戒問既無無漏大種亦應無無漏戒耶答戒由大種而得成色不由大種而成無漏但由心力成無漏故復次厭患諸色入無色定戒是色故彼地中無復次若無色定猶有色者則應無有漸次滅法乃至廣說故彼無戒復次對治惡戒故有善戒無色界定不能對治諸惡戒法故無善戒所以者何諸惡戒法惟欲界有無色於欲具四遠故不能對治云何四遠一所依遠二所緣遠三行相遠四對治遠故無色定無正語等三種

戒支

有三十七菩提分法謂四念住四正勝四神足五根五力七覺支八道支世尊雖說菩提分法而不說有三十七種但說七覺支名菩提分法云何知然經爲量故謂契經說有一苾芻來詣佛所頂禮雙足却住一面而白佛言如世尊說七覺支者何謂七覺支世尊告曰即七種菩提分法名七覺支問菩提分法有三十七何故世尊惟說七覺支名菩提分法答佛隨苾芻所問而答苾芻惟問七覺支故佛惟說七菩提分法若彼苾芻問四念住乃至若問八道支者佛亦應隨彼所問一一而答復次彼契經中惟說無漏菩提分法惟七覺支一向無漏故偏說之餘通有漏故彼不說有作是說餘契經中亦具說有三十七

物六

六

種菩提分法時既久遠彼經滅沒云何知然如彼尊者達羅達多作如是說世尊有時說一道支有時說二乃至有時說三十七即三十七菩提分法如斧柯喻契經中說於三十七修道法中若惟取決定者則應說七種修道法謂七覺支惟無漏故若惟取不決定者則應說餘六位修道法謂四念住乃至八道支通有漏無漏故若通取決定不決定者則應說三十七種修道法謂前六位及七覺支故三十七菩提分法亦是世尊契經所說問菩提分法名有三十七實體有幾耶答此實體有十一或十二若以一切攝入覺支即七覺支名既有七實體亦七信正思惟各惟一種正語業命有說爲二正命即是正語業故有說爲三正語業外有正命故若說爲二即

惟十一若說爲三則有十二所以者何謂四
念住慧根慧力正見攝入擇法覺支四正勝
精進根精進力正勤攝入精進覺支四神足
定根定力正定攝入定覺支念根念力正念
攝入念覺支信根信力合爲信故若以一切
攝入道支即八道支名雖有八實體不定若
說正命即正語業實體惟七若說正命非正
語業實體有八復有信喜輕安捨四故亦十
一或有十二所以者何謂四念住慧根慧力
擇法覺支攝入正見四正勝精進根精進力
精進覺支攝入正勤四神足定根定力定覺
支攝入正定念根念力念覺支攝入正念信
根信力合爲一信故有作是說正語業命戒
自性故應合爲一若作是說菩提分法各有
三十七實體惟十如名實體如是各施設體

施設名異相體異相名異性體異性名差別
體差別名分別體分別名覺體覺應知亦爾
如是名爲菩提分法自性我物相分本性已
說自性所以今當說問何故名爲菩提分法
菩提分法是何義耶答盡無生智說名菩提
已究竟覺四聖諦故若法隨順此究竟覺勢
用增上此中說爲菩提分法已釋總名一一
所以今應別說問何故名念住乃至道支耶
答由念勢力柝除自體故名念住自體即是
有漏五蘊要由念住柝除彼故於正持策身
語意中此最爲勝故名正勝或名正斷於正
修習斷修法時能斷懈怠故名正斷能爲神
妙功德所依故名神足勢用增上故名爲根
難可摧制故名爲力助如實覺故名覺支助
正求趣故名道支問言覺支者是何義耶爲

能覺悟故名覺支爲覺之支故名覺支若能覺悟故名覺支則應一是六非若覺之支故名覺支則應六是一非有作是說此能覺悟故名覺支問若爾則應一是六非答六是覺分能隨順覺從勝而說亦名覺支復有說者是覺之支故名覺支問若爾則應六是一非答擇法是覺亦是覺支餘六是覺支而非覺如正見是道亦是道支餘七是道支而非道心一境性是靜慮亦是靜慮支餘是靜慮支而非靜慮離非時食是齋亦是齋支餘是齋支而非齋此亦如是問言道支者是何義耶爲能求趣故名道支爲道之支故名道支若能求趣故名道支則應一是七非若道之支故名道支則應七是一非有作是說此能求趣故名道支問若爾則應一是七非答七是

道分能隨順道從勝而說亦名道支復有說者是道之支故名道支問若爾則應七是一非如正見是道亦是道支餘七是道支而非道答擇法是覺亦是覺支餘六是覺支而非覺餘如前說已說菩提分法所以次第今當說問何故先說四念住乃至後說八道支耶答隨順文詞巧妙次第法故復次隨順說者受者輕便次第法故復次四念住從初業地乃至盡無生智勢用常勝是故先說四正勝從煖乃至盡無生智勢用常勝是故次說四神足從頂乃至盡無生智勢用常勝是故次說五根從忍乃至盡無生智勢用常勝是故次說五力從世第一法乃至盡無生智勢用常勝是故次說八道支見道中勝七覺支修道中勝問何故八道支見道中勝七覺支修

道中勝耶答求趣義是道支義見道速疾不越期心順求趣義故見道中八道支勝覺悟義是覺支義修道九品數覺悟順覺悟義故修道中七覺支勝問若爾何故先說七覺支後說八道支耶答隨順文詞巧妙次第法故復次隨順說者受者輕便次第法故復次隨順增數次第法故謂先說四次說五次說七後說八故復次顯清淨法漸增長故謂先修四次修五次修七後修八故有餘師說諸修行者先由念住於身等境自相共相如實了知除自相愚及所緣愚導起諸善如有目者引導盲徒是故最初說四念住由念住力了知境已於斷修事能發正勤故於第二說四正勝由正勝力令相續中過失損減功德增盛於殊勝定能正修習故於第三說四神

足由神足力令信等五與出世法為增上緣故於第四說於五根根義既成能招惡趣煩惱惡業不能屈伏故於第五說於五力力義既成能如實覺四聖諦境無有猶豫故於第六說七覺支既如實覺四聖諦已厭捨生死欣趣涅槃故於第七說八道支評曰應知此中前說為勝以修道位鄰近菩提順覺義勝故說覺支又修道位九地九品數數能覺覺支勝故如是已總說菩提分法七位次第今當別說覺支道支二位次第問何故七覺支中先說念覺支乃至後說捨覺支耶答隨順文詞巧妙次第法故復次隨順說者受者輕便次第法故尊者妙音作如是說已見諦者憶念先時所現觀事而為上首修習覺支令漸圓滿如契經說彼於此法繫念思惟令不

迷謬起念覺支修令圓滿念圓滿已於法簡
擇籌量觀察起擇法覺支修令圓滿擇法滿
已發勤精進心不退屈起精進覺支修令圓
滿精進滿已發生勝喜心不染著起喜覺支
修令圓滿喜圓滿已身心倚適離憍沉故起
輕安覺支修令圓滿輕安滿已身心悅樂得
三摩地起定覺支修令圓滿定圓滿已遠離
貪憂心便住捨起捨覺支修令圓滿故七覺
支如是次第問何故八道支中先說正見支
乃至後說正定支耶答隨順文詞巧妙次第
法故復次隨順說者受者輕便次第法故尊
者妙音作如是說求見諦者於現觀事正見
爲先修習道支令漸圓滿如契經說由正見
故起正思惟由正思惟故得正語由正語故
復得正業由正業故復得正命由正命故發

物六

十一

起正勤由正勤故便起正念由正念故能起
正定故八道支如是次第已說次第所依地
今當說問何地有幾菩提分法答未至定中
有三十六除喜覺支初靜慮中具三十七靜
慮中間及第三第四靜慮各惟有三十五除
喜覺支及正思惟第二靜慮有三十六除正
思惟前三無色有三十二除喜覺支及正思
惟正語業命欲界有頂各有二十二除覺支
道支惟無漏故若覺支前說道支者欲界有
頂亦有道支通有漏故已說依地現在前今
當說問何地有幾菩提分法俱時現前答未
至定中有三十六菩提分法惟三十三俱時
現前除三念住所以者何以四念住所緣各
別尚無有二俱時現前況有三四初靜慮中
具三十七惟三十四俱時現前除三念住靜

慮中間及第三第四靜慮各三十五惟三十
二俱時現前除三念住第二靜慮有三十六
惟三十三俱時現前除三念住前三無色有
三十二惟二十九俱時現前除三念住欲界
有頂有二十二惟有十九俱時現前除三念
住餘隨義說非要別體已說現在前雜不雜
相今當說問此三十七菩提分法中諸是覺
支者亦是道支耶答應作四句有是覺支非
道支謂喜輕安捨有是道支非覺支謂正思
惟正語業命有是覺支亦是道支謂除信諸
餘菩提分法有非覺支亦非道支謂信問何
故立喜爲覺支耶答應覺悟義是覺支義喜
順彼勝故立覺支問云何喜順彼勝答以修
道中九地九品數修勝覺如如於諦能如實
覺如是如是發生勝喜如如生喜如是如是

物六

十二

復樂於諦起如實覺如人掘地得諸珍寶如
如掘地如是如是得寶生喜如如得寶生喜
如是如是復樂掘地此亦如是問何故不立
喜爲道支答應求趣義是道支義喜非順彼
勝故不立道支問云何喜非順彼勝答如如
於諦發生勝喜如是如是樂住不去故於求
趣喜非隨順如人在路有所樂著於所趣方
不能速至此亦是問何故輕安捨俱立爲
覺支答應覺悟義是覺支義輕安與捨順彼
勝故俱立覺支問云何輕安捨俱順彼勝耶
答由輕安力息諸事務住平等捨便能於諦
起如實覺故順彼勝問何故輕安捨不立爲
道支答應求趣義是道支義輕安與捨非順
彼勝故不立爲道支問云何此二非順彼勝
答輕安息求捨不樂趣與求趣義一向相違

如去與住睡眠與覺一向相違此亦如是問
正思惟何故立爲道支非覺支耶答願求趣
義是道支義彼策正見求出生死速趣涅槃
如杖捶牛速有所至故立道支求趣不息是
正思惟覺支安靜義不相順諸安靜者能如

物六

十三

實覺是故不立彼爲覺支問何故正語業命
立爲道支非覺支耶答願求趣義是道支義
正語業命如穀能成見道輪故願求趣義立
爲道支順覺悟義是覺支義覺悟非色是相
應有所依有所緣有行相有警覺正語業命
與彼相違故不立爲覺支問何故信不立覺
支道支耶答初發趣時信用增上已入聖位
修覺道支時分不同故俱不立復次諸清淨
法於清淨品相有圓滿者有不圓滿者圓滿
者謂具有根力覺道支相與此相違名不圓

滿不圓滿中有覺支相無道支相者立爲覺
支非道支如喜輕安捨有道支相無覺支相
者立爲道支非覺支如正思惟正語業命相
圓滿者立覺道支如念定慧等不圓滿中無
覺道支相者俱不立如信問何不立心爲菩
提分法答心無菩提分法相故復次心於雜
染清淨品中勢用均等菩提分法於清淨品
勢用偏增是故不立復次菩提分法多緣共
相心多緣自相是故不立復次菩提分法對
治煩惱一切煩惱皆是心所故能對治亦非
是心復次菩提分法輔佐菩提心王不應輔
佐於覺如王無有輔佐臣義復次心令生死
輪轉無窮菩提分法能斷生死義不相應是
故不立復次菩提分法能調伏心不可所調
即能調攝諸有欲令定即心者說心亦是菩

提分法彼違理故非此所論問大地法中何故但立念定慧受為菩提分答念定慧三順清淨品勢用增上菩提分法亦復如是故攝此三受於雜染清淨品中勢用俱勝故亦立為菩提分法有餘師說受於雜染勢用雖勝而於淨品作饒益事如旃荼羅性雖鄙劣而與豪族作饒益事故亦立為菩提分法想思觸欲於雜染品勢用偏增故不立為菩提分法於假想觀勝解偏增菩提分法順真實觀是故勝解非彼所攝有餘師說菩提分法學位偏增至無學位勝解方勝故不立為菩提分法作意於境令心發覺易脫不定菩提分法令心住境義不相應故亦不立有餘師說初取境時作意力勝至境相續彼力漸微菩提分法要取境已多時方有義不相應故亦

物六

十四

不立問何故三受皆通無漏惟立喜為菩提分法答樂捨二受無彼相故復次菩提分法行相猛利樂捨遲鈍故俱不立復次無漏樂受為輕安樂所覆損故捨為行捨所覆損故相不明了故不立為菩提分法問何故尋伺俱通無漏惟立尋為菩提分法答伺無彼相是故不立復次菩提分法行相猛利伺用微劣是故不立復次伺用為尋所覆損故於策正見尋用偏增故伺不立菩提分法問大善地法中何故但立信精進輕安捨四種為菩提分法耶答由此四種順菩提勝故偏立為菩提分法謂趣菩提信為上首將起眾行信為初基故立信為菩提分法精進徧策趣菩提行令速趣向三乘菩提故亦立為菩提分法輕安調適對治憊沉助觀品勝行捨平等

物六

十五

對治掉舉助止品勝菩提分中止觀為主故
俱立為菩提分法慙愧等六散善品中勢用
雖勝而於定善勢用微劣故不立為菩提分
法以菩提分定善攝故有餘師說大善法中
若所治強自性勝者立為覺分餘則不爾所
治強者謂與一切染心相應自性勝者謂眾
行本策發眾行助止觀勝信精進輕安捨皆
具二義慙愧等六無具二者謂慙等五二義
並無不放逸一種惟闕自性勝故不立為菩
提分法問何故欣厭亦體是善而不立為菩
提分法答欣厭二法不能徧緣一心品中無
容俱起助覺非勝是故不立問何故一切色
等法中惟無表色有立覺分非餘法耶答正
語業命隨順聖道勢用偏增故立覺分餘法
不爾是故不立問何故聖種不立覺分答若

於在家及出家眾二事勝者立為覺分一期
心勝二受行勝彼四聖種於出家眾有二事
勝於在家者惟一事勝謂有期心無受行義
如天帝釋坐寶華座有十二那庾多諸天美
女恒自圍繞常有六萬音樂而為娛樂於四
聖種雖有期心無受行義影堅王等諸大國
王給孤獨等諸大長者亦復如是故四聖種
不立覺分有作是說前三聖種無貪善根以
為自性第四聖種即是精進樂斷樂修精進
攝故若作是說第四聖種亦是覺分分別論
者立四十一菩提分法謂四聖種足三十七
不應理故非此所論品類足說云何念覺支
謂聖弟子於苦集滅道思惟苦集滅道起能
助菩提念乃至廣說是未知當知根或諸學
者見生死過患涅槃勝利起能助菩提念乃

物六

十六

至廣說是已知根或阿羅漢觀心解脫起能助菩提念乃至廣說是具知根是名念覺支乃至捨覺支廣說亦爾云何正見謂聖弟子於苦集滅道思惟苦集滅道起擇法乃至廣說是未知當知根或諸學者見生死過患涅槃勝利起擇法乃至廣說是已知根或阿羅漢觀心解脫起擇法乃至廣說是具知根是名正見乃至正定廣說亦爾問何故覺支中說起能助菩提念等言道支中不說起能助菩提擇法等言答應說而不說者當知此義有餘復次欲現異說異文由異說異文故說者受者俱生欣樂復次欲現二門二略二階二證二炬二明二光二影故作是說復次先作是說盡無生智名曰菩提修道位中覺支義顯近菩提故說助菩提見道位中道支義

十六

十七

顯去菩提遠是故不說如契經說不淨觀俱修念覺支依止厭依止離依止滅迴向於捨乃至捨覺支廣說亦爾問不淨觀是有漏七覺支是無漏云何有漏法與無漏法俱尊者世友作如是說以不淨觀攝伏其心令極調柔有堪能已無間能起覺支現前從此復能起不淨觀依如是義故說俱言如契經說諸聖弟子若以一心囑耳聽法能斷五蓋修七覺支速令圓滿問要在意識修所成慧能斷煩惱非在五識生得聞思能斷煩惱如何乃說若以一心囑耳聽法能斷五蓋答依展轉因故作是說謂善耳識無間引生善意識此善意識無間引生聞所成慧此聞所成慧無間引生思所成慧此思所成慧無間引生修所成慧此修所成慧修習純熟能斷五蓋故

不違理問斷五蓋時未能圓滿修七覺支何
 故契經作如是說能斷五蓋修七覺支速令
 圓滿答離欲染時名能斷五蓋離色染時名
 修七覺支離無色染時名速令圓滿故無有
 失有作是說離欲染時名能斷五蓋離無色
 染時名修七覺支速令圓滿此說初後略去
 中間故無有失復有說者無間道時名能斷
 五蓋解脫道時名修七覺支速令圓滿相隣
 近故說名為速

阿毗達磨大毗婆沙論卷第九十六 說一切有部發

音釋

航 都甘切樂也 斧 柯斧方矩切鉞也 柯 柯柄也 析 先擊切莫耕切目猶豫 猶 猶切以周切豫 豫 性多疑故以事不 猗 猗切於其切適施 適 決者為猶豫也 那 那切適輕安也 那 那切適輕安也 多 那由他此云 覺 古羊切 轂 古祿切 那 那切 多 那由他此云 萬德度吳五俱切